

L'éve

Én Val d'Ousta y a tedzor avù dé ruze pé l'éve. Dé ruze qué gnénca dé prosé bièn lon y an resi a rézoudre. Robà l'éve y éve én-a baga bièn grave, i capitéve qué dé faméille ché prédzévon pomé pé dé-z-àn é dé-z-àn, é lé rapor i sonve gató pé dé jénéachón.

So i capitéve perqué, pé lé dzen qué i vivévon dédén la neutra réaletó dé campagne, l'éve i servéve pé bièn dé bague : pé bée, quiezeà, fae bouéya é ché lavà, pé produiye dé énerjì é pé la fer-teletó dé la téra, lo bièn peu émportàn pé lé dzen dé montagne.

L'éve, don dou siel, dédén la fourma dé plodze, qué i servéve pé blèti la campagne, i bastéve jamé surtoù i valló dé l'adré, ioù lo solèi i ba for é la téra i sètse vitto. Pé forteua, la montagne y é én-a rézerva nateéla dé si bièn, qué i vén couiilli d'ivér can i né é d'itsotén i ché fon én formèn dé greu torón. Ma pé la émpléyé é la fae arevà ioù qué i ser, i lle fo bièn dé travail é én-a bon-a organizachón. Fo co bièn dé-z-aténchón. O, perqué l'éve y é én bièn présieu, ma sé on la donte po amodo i pou fae bièn dé dan. Sitte y é én problème qué lé valdotèn cognéson bièn é qué y an rézoulù avoué lo viel sistème di ru. Dé adón, bièn d'éve y é pasoye dézó lé pon.

Co i dzor dé ouèi, mémo sé y a avù én greu tsandzemèn dé la sosiétó, l'idé qué l'éve y é én bièn qué fo émpléyé avoué dé chouèn é qué fo tedzor controlà, i ll'é éncó dédén la téta di dzen qué i tseuyon llor bièn.



lo gnalèi



Région Autonome
Vallée d'Aoste
Regione Autonoma
Valle d'Aosta

Assessorat de l'Éducation
et de la Culture
Assessorato Istruzione
e Cultura

Tiré de :

Texte original écrit par Lidia Philippot et Alexis Bétemps

Texte publié en 2013 dans « L'écho de nos montagnes », paroisse de Valtournenche

Collaborateur de Valtournenche : **Rouja Meynet**

La transcription a été soignée par le Guichet Linguistique

Mise à jour de la graphie : octobre 2013